



帶存堂集

書

遺李文學渭師書

聚首未幾。又作遠遊。惘惘之情。如何可言。弟輩垂髫。相隨。今皆白首。當此離懷。更越恒情。數等。至如飢凶。游迫。謀食為艱。門戶支持。費出不經。又不得不藉。研田作活。計。兄翁此行。事有難已。悠。我思。惟弟知之而已。最不能忘情者。兩郎之間。一以養身為急。不當以塵務經懷。一以體親為念。不當以俗情自委。而吾兄翁平心處之。

書



務使捐形跡而篤天倫歡然無間雖在千里之外豈非  
人間大樂事弟向托契深于其行也敢效一言之贈亦  
與兄翁交之至誼出門後次君負疴固當篤念一應  
家計責任長君而食貧守拙此實難此在兄翁深為  
加意弗至河漢于其言也臨行草佈不勝增注

答李渭師文學書

握別歲餘三接遠教知兄翁注存之殷不以地隔而吾  
兄近履平善差慰鄙懷見射兄札中又知體中作楚但  
遠旅棲遲未免家鄉縈念此徒擾夢寐耳當從主賓歡  
洽舉動自適便可暢滌幽思忘情雲樹亦多愁中減愁

法也敢為左右獻諒同心爾之敝友志伊兄翁平日  
深契也尊人久羈遠外聞入黔省一札相續萬乞留念  
鼎致石翁移文黎平購一確信存則勸歸否亦得實皆  
兄錫類之仁也况石翁氣如雲人士夙仰得吾兄德惠  
自不以迂遠漠置耳萬里關河拜訪為難事隔十載尋  
求匪易千祈多方訊覓不以一訊輒止兼浙中會侯任  
黎同官誼切亦不至愆然視之辰歲幼老在粵弟為代  
懇得入黔之信明廷載半功豈後人切禱切禱承示滇  
卷兒輩受教矣其近有入格處并及以副遠念黔誌前  
偶及如無從覓置不問可也元老今歲仍處飛閣弟已

延金卓兄三令即時相過從今與令姪同事勤課日進  
吾兄應亦釋然于中者臨風溯切翹首何盡

答郭水部疇生書

久隔光儀屋梁月色無不耿耿胸臆間也但媿踰伏草  
里風塵鹿豕以致久不獲奏記于臺下踈戾日甚如何  
可言春月忽拜瑤函不棄鄙人而惠存之蓬室之下噫  
以溫風泥塗之側投以明月使弟有感深而繼之以媿  
者知吾兄臺駕舊不忘而弟自處為公等已珍危佳繒  
至勤遠頌尤切不安恐重違來命肅此拜入身被德口  
啣澤矣謝無盡家射兄以一老縫掖躡躡燕市中諸

蒙垂盼近家邇來稱感盛意未識何以為報也外具款  
烟八笏晶章一事自慙褻甚不敢登東非以報瓊聊申  
芹獻云耳南來佳訊側耳殊擢竊人子僭附寵光額手  
加祝臨風瞻溯可勝翹切

遺姚倩龍起

前月得許使信知門下已稱得麟之喜與內子輩均為  
欣慰及詢吾女產後抱恙此中怛靡已長至日又接  
陳使信吾倩詳述病緣暨迎鑿發藥之苦心足感而大  
人撫恤幼弱已無不至而門下所以慰我遠懷者委曲  
周視如身受之屈指兩逾月矣體中當復霍然自不貽

之戚也。德門衍慶一歲兩雄。希于尊大人前為我致賀。囑素雲何人女醫何授。生長吳地。遊皖何年。識脈處方。遠過鬚眉之上。其淵源得自何許。吾倩幸示其詳。當作一詩紀之。亦是一段佳話。莊學師何名。尊人何官。并示愛懸之心。鞭長不及。思一孥身過問。而家累頻牽。握手未期。近為同兒姻事。拮据遣聘。而結褵之期。又以歲儉中止。少須時月。不免為來年之待耳。端奴布候。薄申燕喜。一爰不腆。少致浣濯之需。倘不以世目見。格則幸矣。猶嫌聞信稍遲。不及湯餅之會。此則未可釋爾。臨風北望。不盡依。

遺王靜御書

憶自辛卯元春承駕枉存。叙濶遽爾言別。迄今已踰二紀。中間雲流波疊。不堪指數。政如信國所言一部史書也。時于選帙中。遙領塵屑。以當晤語。未知吾仁兄曾一念及故人否。弟近落魄風塵。無一善狀。每思扁舟造訪。圖一快談。卒未逢佳會。偶便附候。會墨曾一涉筆。必付梓行。有可以教弟否也。來歲有貴相知。可為弟謀一席之地。朝夕獲聚。良快事也。并及臨箋。瞻溯不盡神馳。

與宗人書

前具藁寄呈蒙把正數條深感教示但有臆見詳述并呈幸賜鑒裁不吝再示為望此書原祈眾謀僉允庶可垂後非一人私見可了近代已草定錄出附覽本欲求益惟高明是正助我不及翹首切囑曾祖以下諸位計有五六世僅得名字其生沒年齒婚葬並無聞知年未輟筆為此更乞宗賢各房詳錄賜教以便續筆照前例編入完書勿致久淹亦先靈之所同鑒也八月八日某拜至懇

如有嘉言美行開示詳入即履歷事蹟亦不當遺陶公云今我不述後生何聞哉念之念之

### 遺介石書

不奉教益者二紀于茲溯從之想與日俱長近聞道業日進為來學表式紫陽之統未墜于地是在介石先生矣譜系未續已歷三世失今不修恐有世遠人湮之歎弟留意多年未敢妄有論述客歲著筆略存義例著書五卷本宗則當詳所自出尤非草草春初已附編目呈覽尊兄稱吾宗掌故當必有以明教我也至讚述祖德諒有同心先尊伯之殉國先節母之範家表入錄中首先譜牒中有日月未明事蹟未備幸一一詳示闔生兄以葵事旋里肅此申候仰惟垂鑒不宣

石帆兄封命乞錄寄。吳能老為伯請邱疏并示。中有  
字面觸時忌者。即虛其格。以口代之可也。粗完家傳  
數則附閱。先呈上。幸賜裁正。

### 遺次山書

不晤教言。倏逾二紀。每思與兄把臂。恨無從飛越大江  
耳。春月九弟旋里。極荷雅誼。似不從世法中得也。譜事  
弟留心已久。世系粗定。而事蹟未詳。本宗則當多為采  
錄。庶云備美。非可草。涉筆。此蘇公所謂詳吾所自出  
也。客秋畧著義例。欲完書五卷。九弟已將編目附覽。尊  
兄不忘先蹟。聞見所歸。更有以廣我望之望之。先尊叔之

詩翰。不傳江淮。僅從姚山期詩源中得窺一二。吾兄能  
以全璧示我。謹入文苑中。石葉叔亦有詩篇。并祈見示。  
荷。閣生兄以營葬歸。肅此申候。仰惟垂鑒。不具。

野臣之詩。為虞山宗伯稿錄。列朝詩選。稱其冥搜深  
討。不蹈恒蹊。有集曰鬼訂。向非吾兄。竟莫能舉似者。  
宜吾宗之傳文寥。耳。此集尚可得覓否。并問前傳  
秋中兄有溯江之行。尚復能來。聯席互訂。相與共證  
此舉。亦大快事也。未知何日能踐約否。

### 遺中黃書

春中九弟旋里。弟以試事留郡。未及奏問起居。罪歸甚

接手教殷，見瞻瞻，知尊兄同體之愛，無間遠邇也。追憶聚首，<sup>忽</sup>又十年，弟近狀拂亂，欲如前對酒夜坐時，已不可得。口衆緒紛，苦難支給。兒輩學書，殊同愚罔，兼有肆侮于弟者，事出不經，問之闍兄，自具顛末。吾兄或不督過弟，為有礙宗誼否乎？開歲仲春，為尊兄稀齡誕辰，弟當趨庭展敬，方以在遠，負罪薄儀三星，少進壽觴之獻，幸祈鑒茹，統膺多福。

譜事弟留心久之，將有就緒，而本宗則老泉所謂詳吾所自出也，不宜闕畧。尊兄為吾家文獻，如有見聞，幸以示我，採入錄中，庶稱完璧。囑闍兄念祖心切，惟尊兄力持而欣助之，仁人用心，諒有同然。又及。

### 遺右軍書

春月九弟歸，以試事羈郡中，未獲劈箋申候，負罪殊深。嗣接來教，良感注存，兼悉福履，駢集欣慰，何似憶癸夏過臨，忽踰五載，何日取道嚴江，扁舟到門，把袂快談，知吾兄具有同心，其快不獨弟受之也。闍兄以大事未終，拮据歸家，草布夙衷，惟垂鑒察，不盡。

闍生心切念祖，而力不及，出疏告助，先有入手，未免化去，行笈所携，想在巫峰上下，恐事有未集，望兄稍

為應付或于一二之數索其手券寄出弟為措納可也萬一

遺彌六書

庚辰之秋。聯席接話者數月。時愚尚穉年。迄今白首。古人所以致歎于速老也。吾兄子將母與愚同有此恨乎。每懷兄子。風神韶秀。當為貢世之珍。今亦冉一老矣。放廢如某。何堪向人復置喙也。夏初九弟歸。得悉近祉。數十年。起飢之懷。一朝願解。固為樂事。愚從事譜牒亦已有年。先人美行。多從購訪。欲以脩近代之盛。吾兄子家藏珍異。能開筭以授我。何幸如之。聞老旋里中。草布濶

悰。諸惟鑒照不一。

與徐彥為札

近為衰病。人事多廢。獻歲賀節。雖至。愛如足下。未及。荀登堂。當亦仁兄所垂諒也。自顧寒薄。向與宅上諸賢。從間無所開罪。不意令伯大人。突以元宵夕。御飲暗砌入縣。以此見處。即加之。鄉愚市糴。尚屬不堪。况素承相愛如弟者乎。此事雖名感舉。今為惡俗。有文訪察之稱。通國所知也。目前不無需索之擾。日後即同禁錮之例。欲向人前開口不得。若旦夕未即死。安保他日。畫符鄉評。妄冒濫舉。誰任其咎。果係美情。見推終須一言相聞。

呈學呈縣有如密報與送訪何異此中美惡不言自明  
尚此不避斧誅千祈轉達令伯特出回天之力萬勿以  
俗陋惡劣之狀待我懇恕

復王方伯言遠書

仰止道風已非晨夕應接人區而亭埃壻之表揆之  
當世惟王先生一人某心切溯從能掃門以列墻宇  
引疾何深澄卿世兄至拜手教之及朗懷照人恍投  
明月此係棠陰遺植某豈有胸無心前者竊效一得思  
拔之泥塗而沃以清土幸托此中莫免流離未為非計  
也不料澄卿陷入風塵去之惟恐不速而某反以擇人

之不審見晒于溜流舍此而事奔走徒自領受苦趣今  
來周旋兩旬益增惘然踟躕窮途將有不可言者此事  
尚賴先生為一倡導至為渠謀一結竟之地某雖弱劣  
分當稍盡涓埃以從不然升斗自活豈能長有今日哉  
言之可為矜色恃在同心敢布區區仰惟鑒察可勝主  
臣薛楚老幸此名申致統俟入郡日踵候不一

與吳志伊檢討求誌墓書 壬戌五月七日

不接光儀者十載于茲跋懷之私未嘗一日少置也先  
生夙擅著作之才宜在日月之右迄今珥筆承明枚馬  
絕業豈令千古之上專其美北門清華不足為先生崇耀

耳弟自慙荒鄙，候問缺然，踈野之况，不言可知。年來日就頽唐，故業放廢，諸兒失學，經無可傳，釋兒替否，循例補衿，去秋與觀闈事，種、敗事，不堪向知，已述也。姚倩龍起名溥，入雍肄業，仰止高山，景行儀切，敢假烏屋之愛，俾羨龍門之登，惟先生弗秘金針，而誨之廣，為導掖，皆德造盛心也。更有懇者，先慈生平勞善，思託椽筆，一言闡揚，寔日已久，或邀夙昔之知，而錫之銘，寵逾百朋矣。家狀一冊呈覽，狀語過煩，冀大文以簡言括之。如歐陽集中渤海誌，禁施多矣，此某所哀拜以求，而未敢有瀆也。先生能推不匱之錫，慨然有以慰之否。家綿一稱。

屏危一器，謹佈潤棕，褻甚不敢登東，幸惟叱存千里，將忱願言不盡，臨風翹溯，曷勝惶悚。

為俞水方致工部郎吳子磐書戊辰春旅餘

憶先君以廷對羈都下，蒙世兄先生紵縞之歡，五載慇懃，投分非淺。先君歸念高誼，倍越恒等，謂孺子他日得假鞭馭而使之長鳴者，必先生也。但某屈首故園，無緣掃長者之門，稍能自達，親承顏色，三十年于茲，踈戾之愆，有如山積，拊心無可解免。在先生宏度，諒能鑒其驚蹇，而不加以譴責爾矣。先君訓壽八載，首藉寒齋，兼之瘠邑，竒歎諸生追道，莫應為之師者，舍談經而課賦，無

以塞上官之嚴督。又安問盤中所有哉。量移而丞三原。至不能辦。歸裝千里赴程。益非所習矣。荷舍親嚴顯翁力言于藩伯。縣車就間。七十老翁。不疲于車馬之後。敝御水旱不常。益窘于珠桂之計。適刘世兄出。參鳩江扁舟往晤。得免于飢歲之患者。皆其力耳。嗣此謝世。至今十年。去冬告之戚友。勉完窀穸。而寒士之態。不言可知矣。此皆家人絮語。仰先生肺腑之愛。不憚奉以相告。當不以為鄙子之瀆。而厭聞之也。前于介社壽世兄。屢接德音。時勤下詢。深感注存。值台旌之淮。章首也。思欲走謁節下。一親光儀。卒勢與願阻。又不果前。此衷愧歎。

彌甚。茲附鴻便。肅勒布候。瞻望之私。久在慈照。踈野濶。悰不脩。不莊。臨箋企溯。倍萬主臣。

為俞水方致彰德守吳子磐書 己巳秋

昨歲壽舍親入都。曾奏記老世翁門下。附候起居。想徹台覽。嗣閱邸抄。恭聞開節。鄴下。又深為兩河之民。慶福星之臨一路也。自此治行為天下第一。鋒車內召。不日可期。其覲焉賤士。即甚不肖乎。而寵光所貴。竊附故人之末。亦與有榮施矣。但念先嚴一羶匏落。十載家居。迨年踰八。衰而偃蹇。食貧未嘗不思與門下同堂會晤之為樂耳。嚴君即世。久在淺土。某與兄多年勉營。僅而襄

事然律以凡子之禮愧十未能盡其一二矣客臘又遭  
先兄之變不出十日嫂姪繼之慘戚疊乘手口交瘁何  
堪縷舉以溷高聽以門下辱契最深情猶一家當不以  
語不擇音而厚誅其狂率則其誠大幸在先君居常對  
家人告語注想雲誼曾不去口相去三十餘載生死啣  
感何敢一日忘之特其跣伏泥塗向未獲走一介覲台  
光以貢積忱踈與怠并其又無所逃罪謹擬來春買驢  
就道伏候交戟之下固知世兄在隆情在昔垂卹先人  
令得從牛衣下階泥首造見仰沐光華恩非倫等造次  
未敢悉陳肅勒荒函千里上候不莊不備統祈弘慈鑒

原不勝翹溯悚惶之至

為俞水方致山東運副劉松舟書

蕪江叩晤重荷老世翁隆盼某父子載德而歸歷今二  
十春秋銘戴有如一日丙春兄某又謁見門下于洋河  
殷、推解不減先君之在時深嘆門下高誼之薄雲某  
一家俱在燼覆中真謂死生啣戟匪筆舌所能罄也嗣  
聞治績日彰簡佐驂政建節東省地加遠而馳戀亦加  
長矣自以不能趨伏轅下躬候起居負罪良多猶望洪  
慈或可寬其萬一也先君下世多年勉營負土僅而襄  
事皆門下遺澤之所及也然愈增子媿矣去臘慘逢先

兄之變，不十日而殞。十七日，而嫂姪隨之。三喪在殯，一室啼號，人間可哀。莫棘于此，諒世兄視同一體。當亦聞之而酸鼻者矣。家門不祥，不宜縷奉以動清聽。託契最深，休戚關念，幸勿以瀆陳。其狂率也，注想高深，無繇自達。顯望政聲上逮，茂膺主眷，借冠南來，俾寒瘁故人得近化日而起之瘡也。此某之所幸，予加祝者耳。吳世兄處，從未通問，積愆恐所不免。今已出守鄴郡，某欲修謁，未審肯賜容接否。倘有便郵到鄴，并乞一言先之。庶不至以踈賤蒙斥，所賴九鼎之力，更何如耶。久處申候，草勒佈衷，荒函不壯，統冀隆宥。臨夏惶悚，冒勝翹瞻。

候范道原札

秋間聞貴體違和，即欲作字相候。弟自八月偶患脾疾，至今未痊。此時殊覺憊甚，未及一致微忱，抱歎殊深。前月知駕出邑見過，而弟不知，又失把晤，惟兄諒我，當不加罪也。弟患非繇傷脾，實是氣衰之故。寒夜常至數起，覺為所苦。友人勸服八味，亦未全愈。外儀三星，稍奉藥餌之用，托便寄上，祈檢入為荷。歲前來邑中，并望一面。幸、餘不盡。

復若思姪書

淮浙千里，鴻羽難得。前接劉客惠音，恍投明月，感佩遙

光情溢面對。歲星三易。緬懷三位賢姪。近履夢寐為勞。忽承翰教。遠頌真怒。飢中如獲大牢之享也。賢孀高行。不媿古媛。一戈奉祝。此非泛常稱壽之比。又荷兩令弟。垂惠扇墨多儀。反增不安。遠貺無從藉璧。報登謝。壽文容細閱。梓入文紀。常為問史之光。非好阿也。年來刻就譜二本附覽。但客船不能多寄。俟後便再奉。賜儀已刻選舉一卷。謹勒賢郎佳名。他日期為科甲中人。或能鑒此鄙衷耳。方教姪一第。方為家門志喜。飛而垂翼。却甚可惜。今辦事兵部。尚留京師。三年當受一職。歸也能先姪聞已得子。喜甚。便中以名聞。續刻入譜。為囑稼弟。不能多及。統惟鑒原。臨楮虔切。

復若思姪書 庚午五月

去夏重辱瑤音。迄今一載。正在懷想間。思德門定膺綏祉。而客郵適至。何昆玉之垂念老人不置也。錫侯姪篤貌晶心。望而知為遐福之器。奈天不祐仁人。無祿聞緘。不覺淚下。綆縻何奪我契愛之速也。兩次惠存。實深眷戀。誠嘆為宗中秀出。忽焉告逝。當為奉宗掩色。不独愚一人之哀耳。遠隔千里。不能身與終殮之禮。此中何以

自安惘、靡極。辦香致敬，尚圖負便。展忱尤望昆玉不  
深督我寸心所假，以少寬者也。譜事十完其七，城南宗  
房一派，誼不能起，走索數次，許彙輯見付，竟至久延，成  
事之難如此。今在刻文錄一卷，彙媪母壽文已刪潤授  
梓，俟完此卷，即就送覽。三姪五姪得子，吾姪得孫，一歲  
三雄，良為門楣之慶。行間有餘，當補入以報命。兩郎君  
學業較前愈進，轉眼秋闈，側聽好音，驚兒不能作驥尾  
之附也。行客回淮，草此率復，中情縷亂，不及盡述。諸惟  
垂察臨楮，瞻睇不一。

謝方叔晉袁兩姪京邸祝生日書

辛未三月望日

去夏北上，匆言別滿，擬晉姪秋風搏翮，為家門盛事。  
屆期寂，不過遲此三年，豐其羽毛而決起者，必九千  
里也。授館都下，與教姪有埶篋之和，雖去家猶得家也。  
文武言甫，端在君家，兄弟誠足自豪，愚輩所樂觀也。賤  
日蒙昆玉垂憶，撫存老人之甚至，一生浪棄，無一善狀。  
此日泛舟西溪看梅，旬日而歸，不受家人之祝，一切親  
知閉門謝去，來惠自不敢當。佳墨翰扇，遠來京邸，又難  
例却，而領惠則已深矣。謝：六姪在東倉載木棉至邑，  
聚首月餘，方返棹，良稱快事。尊公作誌，去歲已刻入譜  
中，見惠刻資二金，種：厚意苦無以報，如何。無山公同

宗在念，索其譜系。向來又作慳狀。去歲託袁姪過訪。家有武科二三人，欲得其名第而書之。與教姪相上下，不意諧人又從而入也。彼既無意，亦不須強索耳。無黨札來，每道昆玉時相親暱。天涯至戚相遇，亦非偶然也。旭公久慕其才，一札見投，甚感不棄。今有報音，晤時道達鄙意，千里囑筆，惟順時自保。依：不盡。

答呂倩無黨京邸祝生日書 辛未三月望日

握手言別，一載于茲。每一念及，輒用泣然。哀老人之衰病日增，未知相見有日否耳。知足下寘我于懷，諒有同情。然在足下以譽髦之資，履遊京華，正云陸生之藉甚。

長安不使古人專有之，而老懷之倦注，亦未嘗不于此少慰也。賤日垂蒙垂憶，佳研良書，遠來京邸，此種皆生平所夙愛。今視為契濶，故人不能日與相習，如何。繇來此貨難得，而拜惠則已深矣。謝：自願虛生，悵：至老不欲受家人之奉，出走西溪探梅，旬日而歸。今年花信為寒凍所勒，此時正爾爛熳，屬有天緣，偶作一詩付梓。未竣後，此寄足下一覽風味，殊不惡。晉袁兩姪在都門時，親奉采札來，輒道盛意。天涯至戚相遇，非偶然也。外一回札，晤時面達為囑，所云正子者，向來原作慳狀，與及下前此往來稱熟，因便索取。彼既無意，亦不必與之。

強聯也。千里鴻筆，不盡所懷，惟慎自保，愛度切。

老眼昏花，落筆塗鴉，竟不能書。若在紅箋，覽之直如無字。此後見及，幸以白箋書之，媿之。

再復若思姪書 辛未九月三日

去夏手教遠詢，荷昆玉愛念之勤，不以千里舍我。又知錫炭姪前冬之變，殊出意外。兩次造晤，極承繼續，方擬自此常得與昆玉通一線之忱。將來未已，不意遽爾下世。何天不祐善，乃至此乎。撫心甚痛，正欲修辦香之儀于靈筵，而魚雁難憑，故爾遲遲。此時即有一札附盛澤，紉客轉寄，詎料竟置浮沉，使我懷不達耶。遠地通問之

難如此，不勝悵惘。今于菊月之朔，又得盛澤寄詢，知闔宅清佳，鄙懷滋慰。愚日就衰老，自謂讀書一生無所見，長止謂粗知文義，欲一見之于譜，俾諸祖父傳家錄不自我而絕此愚區。一念所以報也，竟有旁人笑為不急之務，愚亦不因之而阻。十年于茲，什完其八。今年已了岑川一房，去春兒遊泮，訪石帆<sup>生</sup>先<sup>生</sup>段庄，晤其子孫，錄其數世行述而歸，編入錄中，亦幸事也。今所待者，有城南曹村二宗，寄書屢索，許以錄全見示，已五年矣。每望杳然，俟其至，編次付梓，即可竣局。然亦難必耳。此事惟昆玉諄：在念吾族無兩，此真孝廉家風，愚故

佩服何日成書齋奉亦彼此稱快也去歲得孫之慶麟  
趾振端為吾姪作誦耳一江遙隔思見無期過承昆  
玉相念不覺言之縷臨風懷想諸惟垂照珍保是望  
不盡依

前示旭公系下初刻不詳特如命另刊稿二葉附覽  
稼弟去世方及三年長子履端得病二旬于八月廿  
六日下世亦為恻事今春愚已浪過七十避去杭城  
西溪自咏見懷數紙奉覽客中同志并轉致之此  
後寄札煩書來客尊號于上以便轉寄相託

復循先姪書

午夏徐客到舍寄示來教曾附報札想已徹覽但若老  
之不祿至今痛腸未平也祖祠修墜僅及其半棲靈  
有所非令昆歸日力為創始何以致此今堂門未復垣  
墻未周日延一日益甚將來之憂大昭叔遠至固所不  
能辭也賢叔姪念昔先人意有獨至雖經輸助而工浩  
難竣思令先兄在徽曾有置產備祭之願今以祠工  
視祭事其緩急更有不同敢進一言于左右聽尊意酌  
應或少移以濟此先靈亦必鑒此也哲人云止舉族  
所悼愚辱至愛情何能伸千里一芻聊附古人之誼儀  
不能備而意則少罄伏冀告之几筵而茹之虔注何已

北望懷思。朔風多厲。諸惟珍愛。不盡依。

復文與也 辛未十月

仰止高門。景行無自。不意垂老而見文先生也。草堂一  
晤。殊慰夙生。春秋六易。邈懷光儀。常在屋梁。落月間也。  
前歲適有宗人之便。敬附八行。一候興居。思得名翰數  
言。侈為家珍之勝。頃葉星老來。忽接手教。雅意慇懃。溢  
于緘外。弟捧讀愧汗交至矣。又承瑤篇秘墨。錯落扇頭。  
弟得之有匹夫懷璧之虞。在先生不免明珠暗投。如何  
如何。弟一生浪棄。老大徒傷。何足云祝。致煩先生垂念  
耶。謝。下邑荒鄙。不足奉長者杖履。逝宵適我。弟當效

季偉之款。林宗以草蔬供朝夕。亦是昔人高致。弟延頸  
俟之。明歲憶為先生葦甲之期。此時扁舟造門。一申躋  
堂之敬。雖老體多憊。終思賈勇而前。少遂鄙懷。兼欲造  
請先朝故實。以領至教。便足餘生樂事。先此鳴謝。唯冀  
照察。倍萬主臣。

與北懸族孫書 辛未十一月廿六日

夏間曾奉小札。一詩寄意。諒久入覽。邇來宗文老體清  
吉。當不似鄙人之衰倦。年內兩目茫然。不親書卷。視之  
一如白楮。他又何言耶。只為譚事未竟。一生志願。十載  
心勞。起此微明。了却全書。日夜牽心。岑錄得宗文手輯。

首尾合法。愚因而卒事，即行付梓，已刻大半，印出送覽。餘六房事略，悉始末藁，詮定首房完備無遺。知宗文之由心祖系有素矣。諸房不無太畧，其中尚有賢者，當為表彰。如魯生非聞諸老，年皆上壽，生前必有嘉行，并其卒年未詳，此愚所未安也。煩即訪實見示，尚能補入若落板，恐無及矣。此後約有廿紙，開歲可了。足慰宗文之望耳。刻資愚自任之，不勞垂念。但有懇者，城南曹村二房，義不可闕。未得其近系，城南已索之，再三俟之數年，許以定本寄出，竟尔杳然。想來讀書者少，未知下筆故也。抑豈不信吾言耶？愚在千里之外，面諮甚難。此二房

須宗文為我一了。况近年來清明，吾文往會墓下，與彼宗人相習，稍留一二日，面對彼衆，逐一詢明，而筆錄之。明註前譜中，某公子、某公孫，若遠出在外者，即不詳，亦闕之而已。若必待其詳，成譜無日矣。曹村聞皆廢業，文墨愈少，尤望吾文不惜往詢，據其現在而書之，存其大略，不失吾兩人收族之心足矣。北海後人重須留意得此二房系略，即可續入統宗之後，覓便寄出，俾愚速完此譜，即明珠拱璧，不加于此，吾文之惠大矣。易世而後，知有近宗續畧者，唯愚與北懸先生相助有成，可謂二人同心。此外更有誰耶？吾文岑錄已有前例，仿而行之，亦

易事也。但費駕數日之停。知宗丈應不吝此也。千里履  
禱。唯冀。苗意。罔之。無虛我囑。至切。餘惟順時保玉  
自愛。

紀事一編附覽。終有相託語。幸審裁之。前來札云。  
偉人姪冬間至吳。必令相見。今其時也。來藁二本。俟  
來晤面。璧。

与范依京廣文書

辛未十一月廿日

天台仙境也。學者師仙官也。裒然大耋。仙齡也。三者人  
有一于此。便足稱尊。翁文以一身兼有之。豈不誠洞府  
中人哉。今秋覽揆初度。是非凡俗高年者比。与弟同年

少而至今日。尤非凡俗稱祝者比。已草宦邸之勝跡。少  
抒上觴之鄙願。題之扇頭。侑以一樽。遙寄左右。翁丈覽  
此。當亦領首而笑曰。非曹生不能為此。庶使五十年交  
情。藉是一慰否乎。但胸緒荒落。一時不能速就。或可寬  
其後至之罰。幸矣。弟今春亦七十四。願無徒不受家人  
之祝。出走西溪。梅花爛熳。供我朝夕。自謂得仙入窟。亦  
是有生快事。搆得數言。刻有小箋。謹奉數紙。呈教。近有  
南渚一友。来自貴署。得悉翁丈近履康嘉。此中輒為忻  
躍。文宗新試甫畢。公門苑李。又收花實。幾多矣。適在大  
慶之期。所謂老逢蔗境。漸入愈佳。更何等耶。特附郎君

家郵奉賀伏惟垂鑒曷勝榮荷

與文與也書 壬申臘

夙在素心石湖良會得奉教言至今又經七載別易會難古人所歎誠有若此也客歲承先生記及賤辰賜之佳咏弟已鏤版入之寒譜當世載其德矣今遇先生壽開六袞原擬扁舟詣宅一申躋堂之祝庶幾既君見子而無遐心也不意夏末老體苦熱伏枕兩月年來目青出無所見遂使覲止之懷欲前且却大違厥心悵復如何逝宵適我唯有望于先生也兼有家國往事希一面記屢思掃徑以候長者此中耿耿雖老弗忘耳時欲探

問未得其便近有坊友汪秉六兄常以刻事往來于蘇嘉之間藉此作寄書郵其人誠信可託也拙扇家傳附此呈教但恐鄙詞不足以發潛德聊寄一笑壇葛歛烟自慙不腆假紵縞以介春酒引墨池以代笙歌或亦有道之所見許乎祈鑒其微忱即加以入荷臨風還湘不盡神馳

尊先生所著烈皇小識及先撰志求假一覽抄過奉納半歲為期即托汪兄送到萬無浮沉或尊意未便容俟後日寄來先太史大字一幅的係篆筆祖父手藏于今百年欲藉文孫作跋繼之以書其後亦佳

事也當付裝潢以光蓬室一扇求圖小影諒所不吝耳又白

與文與也書

春初捧接教言有如晤對忽焉深秋夢想之勞與日俱積遙知道履清吉山中豐和自勝去年也小識承惠教先公遺澤敬佩不忘久當奉璧必須汪兄返吳親費庶為的當耳無承墨妙題贈種々領教不盡謝々自媿無以報明德所藏先太史真蹟謹以幅納之記室此事亦古人所重先生能作詩以遺我亦是一段佳話得榮多矣餘書在案假我以慰渴思但不敢累瀆也秋氣清佳

杖履逍遙必有撰著并以示我欣企更何如耶草此布候東望惓々惟祈鑒照不宣

去年雷震得見唐子畏英骨處當事作意修復洵屬罕見但聞作亭于側揭才子二字未盡其美當日唐先生曾圖一石江南第一才子不若置扁書此八字以表之得先生倡同志以畢此舉何如

與黃太冲求作譜序書乙亥二月清明

丙春枉教面接聚談迄今廿載古人云一日三秋不啻什倍過之鷄鳴之咏調飢之勞未足喻其懷想也嗣後石渠館閣無不仰重著作大集刻布坊間已得而讀之

脩掌故、徵文獻、史學道統、兩擅其長、近世誠無匹也。續刻之歟、令者、過覓無有、淮刻三集、亦曾一見、皆未及收。先生若能惠教、當納價奉求、某幸生同方、而一江間之、不得時親道、範踈辰之愆、真莫能解、如何、如何、去春在呂勝千處、貽札到彼、楮末猶承語及、何先生之不遺鄙陋也、一生毫無見長、祇將所得、料理寒譜、已十五年、差有完局、而未得弁冕之篇、冠之首簡、外其譜稿呈覽、向荷企愛、莫如先生、尚祈不我遐棄、而賜以文、寒門得先生而重矣、譜開自唐季、不附題、遠確而可守、曆有纂述、久而無遺、二者寒譜之能微信也、今自萬曆癸丑、報筆。

八十載、已踰三世、及今不修、患將中斷、乞先生以千秋之筆、為我闡一家之言、再拜以懇、百世永之、有貴鄉董丈、歸里、草此佈候、歛墨湖紗、少展鄙忱、蕪律不文、并書便面、就正、統冀弘雅垂鑒、春風多厲、餘惟為道自愛、順時珍保、東望虔切、臨楮依依。

與無錫高節培書 乙亥二月

仰止道風、匪朝伊夕、久欲鼓棹、以造清門、親承塵誨、一聞先哲之緒言、洵屬生平快事、奈無階可謁、坐是退沮、浪過一生、愧悔何及、然思與先生玄對、未嘗一日去懷也、近因舍姪在錫、得悉起居、又荷先生不棄、每進而教。

之在弟亦所欣慰。向于道業柔翰用之良苦。今老而惰廢。兩無所得。知先生尚有以起予也。及見書法淋漓。亦為學古有獲之一斑。文莫而後。未有其匹。心摩手撫。寢食可忘。倘蒙不我鄙棄。賜以毫楮。如飢十日而饗以太牢也。至荷至禱。近欲製額懸之堂齋。必得高賢題墨。傳之永。瞻仰無既。具楮以請。未知可落墨否。張爐一具。選毫十管。此種出敝地為佳。少供清齋一玩。拙咏畧存素心。并小刻奉正。恐不免方家貽笑耳。如何。統此申候。不勝溯從。惟祈弘鑒。臨楮悚惶。

崇禎朝紀畧一書。初年為姚文毅公筆。以後文係先

生續輯。當有刻本。未及寓目。今板存何處。印行何所。并乞示知。或能惠教。更感。

答兄子聞在書 丙子九月廿三日

愚老廢無似。久棄于世。荷姪諄々遠念。私衷固所願見。託抄白翁詩。不以為迂而忽之。此番抄寄已三次矣。即此知足下謏言之信。用意之勤。唯我輩具悉。此種他人難與言也。久服吾姪讀書靜養。必為將來令器。今果見知文衡。及讀試卷。光氣溢出。不待明眼人自皆見之。吾家儒風百年。邇來青其衿者漸生寂。吾姪一振而起。接武有人矣。一詩述懷。書之便面。并譜錄全冊寄上。非

敢言賀，聊附寶劍烈士之贈。幸弗哂其人情半張紙也。自謂十年精力，盡在此書。承來札之及，盛相推獎，乃信文章之有神，必子也。能讀吾書者，午夏次孫不器院試見錄，與姪連臂遊序，直欲喜而不寐，是亦先人遺蔭也。修祠竣工，勢不可緩，昭叔族尊，遠來告助，在叔果屬賢勞，在外孫支，自應聞風趨命。此事人各有心，無煩勸勉。但未知天緣湊集何如耳。愚老景日侵，相見不知何期。臨風溯想，不盡依。

答葉已畦使君作集序見貽書

弟以猥鄙之夫，甕中窺天，竊欲附古人之一班，往之不

見棄于有道，數年前曾輯寒族譜錄一書。姚江黃先生序之，今思少輯敝草，又得先生為之，即太冲之遇元晏，豈復過此。但弟無練都之筆，辱先生教，負慚甚矣。年來弟老且賸，人事多絕，惟以不得日親函丈，深為悒快。去春有坊間汪友過蘇，曾附尺一，託其造宅申候，晤令孫大兄，少悉福履，乃以弁言為之請。所謂知己一言便可信後，而先生必終教之，不至河漢于弟。此中感銘沒身無極。然吾輩交期，須使質言可受。先生中間盛為推許，不無過實。弟當之而多愧色。更期先生論文之暇，為弟除其愧而存其質。庶見吾兩人至誼，有不在世格崇獎

之內也。拜嘉拱壁，卒無以報。歎謝歎謝，使乎遠來，又煩重勞，少致青蚨，殊淺也。種、餘情，何日駕過，尚圖面罄不一。

### 遺景孝四姪

鷓首榮發，愚以衰老不及趨送河干，至今懷歎。而姪之加意于我，銘心當何如也。聞吾姪履任，各事佳適，但衙署淺狹，今已得居停矣。前月間友來，又承笋栗之惠，慙慙垂念，冬寒邀庇，幸皆安適。但季兒又殤長女，老人不能無淚。今月七日事也。山城淳樸，禮重師長，猶存古風。在吾姪須加容接，弗失長養之義，則兩得之矣。穩守過去，得一美遷，此愚之深為吾姪期也。前來人行促，裁答遲久，幸弗罪。家集二刻，舊藁二刻，各二冊，聊奉清覽。西望曛然，不勝依依。

### 與希明

別來五載，無日不念吾姪起居，舉事順意，方慰遠懷。閏月望日，聞在至舍，得悉近况，兼接手札，知吾姪之不忘老人，彼此同然。去冬即知吾姪得雄，善人有後，久而始驗，喜而不寐，更可知也。屢欲致賀，因乏便羽，悵、此中憶來月晬盤之期，銀錢一枚，殊愧淺、中勒二語，聊申祝詞，適逢吳兄之便，托其寄上，料信到日，正及週期，尤

屬可喜。惟吾姪鑒存荷。橙棗之惠。并謝南中小錄。此間尚未及見。聞在捷音。正在懸念。生兒命名自佳。當補刻譜中。不負來示。來友行迫。匆。附達不盡。

### 與紹周札

同氣至親。祇為一江阻隔。久不得親覲顏面。何緣之慳也。夏初。因全椒之事。藉此得老弟惠顧。半生斯有。數夕之歡聚。良亦快事也。愚性簡泊。朝夕多有缺畧。獲老弟見諒。不加督過。幸。臨行未盡一瞻之敬。至今懷歎。愚為呈坎英事。敝友至里。數言申候。并謝前愆。紅氈一條。特致備用。意有未盡。伏惟垂察。伯叔兄弟。并乞一一。

### 道意

#### 與希明

前沈友至里。諸事紛紜。未及一札通問。歎反殊深。承吾姪慇。垂念。又蒙珍惠。使受者何以克當。益增罪戾耳。姪前所舉子。屈指兩週。方為遙慶。為不意八月見殤。為之惻然。于表。幾至廢食。吾姪正須安養。精力強固。得能之喜。似可計待也。胸次耿耿。竟便奉慰。惟祈老姪俯聽鄙言。勿傷老懷。冬寒。幸加珍慎。為囑。餘當圖報。未盡。

#### 復元孫天譽彌六子

丁巳秋。愚有事于續譜。訪輯遺聞。無如先尊人。曾寄短

札寄懇及札至而尊人委世矣。去今廿餘載，哀感如一日也。去秋聞在姪過我，詢知兄孫能讀書承志，可稱有後。五內為之快然。即今追憶不忘，問誌于我，亦其大端也。愚即來意，固不敢遲，候暇日按藁畧細為筆述，殊愧不文，無以發尊人之潛懿也。如何如何，草此先後，幸祈垂鑒不一。

與吳中翰慶伯求八十壽序書

側聞三吳之地，求以文章命世者，必為吳先生屈第一指。三十年于茲矣，弟某仰止徒殷，而陟階無自，維緣之慳乎，祇憾哀鈍之質，不足供有道之驅策也。往秋頑兒

唐突函丈，為家司馬刻集，祈賜一言為重，不蒙鄙叱，而竟假之弁言，先生之惠我至矣。焚誦以迄今日，何可報也。謝上無已，頃承令甥賀節過舍，因出前作讀之，令甥又為某賤日之及，更欲懇鴻文以張蓬室，而某又未敢輕瀆也。或恃宅相之愛，而推至屋上之烏，未必終拒于大方也。窈子無以將敬，山茗一瓶，文露一部，附呈清供，不揮其褻，而叱置之，仰荷洪慈，不勝虔懇。臨箋主臣。

與希明

開歲春回，顛望吾姪，必有喜兆。老懷虔望，寤寐以之。哀暮如我，但得安常自樂，皆窳餘庇也。屢承垂念，不忘遺

老未有如吾姪之加意者。此表感切，曾無以報。尚圖稍展寸心，今愧未遑也。因便附謝，惟祈始諒不一。

復文起天譽兩兄孫

德門仰重，莫如昆玉。至于敦本率族，如兩賢君，尤愚之所心折欣慕者也。碌碌徒老，無補于世，何足當賢昆玉之函及哉。尊儀遠錫，增生惶悚，素屬雅愛，尤難固違。率爾拜嘉，先此申謝。區區之意，尚未有以報也。承命作賢君誌文，草出送覽，才澁筆秃，未能盡其闡揚，恐無當于尊意，如何。唯祈鑒察，餘悰不盡。

谷龍源宗人凌遠書

百年宗家，南北間阻，不能會祠下而叙倫好。此中歎及殊自惆悵。寅秋聞在姪郵致來教，兼惠佳製，因嘆吾宗之多賢，愚年近耄，不能盡識，尤自愧也。愚一生蹇拙，祇與文字多作良緣，不能如前人之統宗會譜，僅從近房草輯一錄，近已閣筆。見者皆謂迂事，不知賢從何所聞而翻然下教也。慙見囑，固是素願。年來衰病，苦無心緒，未料能副尊委否也。久之便羽未及，裁答料來春歲試將及，必與聞姪相晤，草此附報，諸所不盡，幸惟垂鑒。譜詩一冊奉覽，岩房叔氏某頓首。

壬午春正與聞在書

猷歲誕新，顯瞻閣宅，駢福新禧，增勝遠人，額手以祝。曷  
其有已。臆初寄俞力復音，望邊諒已入覽。十九日又接  
雍升兄來札，寄得白叔遺詩二冊，具見吾姪留意之專，  
用力之勤，它人無似也。心服。已摘選四十首附入  
前錄。今歲始當謀刻，但未能一時了事，不知餘年可待  
否。若得告竣，不負盛念，不遺宗美，良快事也。尊堂華誕，  
自當稍効筆墨，以抒素忱。况重以來命乎。但近體日悠，  
一牽筆則頭眩然，遂即中止。俟春夏間，天日平和，勉應  
諄命，聊盡展之情，何如也。雍升兄為愚寫譜入刻，相  
交十年，今賀後來里中，已承眷存，今特草此附候。凡在

親友，多方嚙置，當不俟愚言之畢也。呈坎未了之事，既  
經行查，臆終必然完局。蔣公處，行查之後，不知曾具摺  
先覆否。便間乞詢實示我，不必向彼人作說。以渠多誕  
耳。世譜欲多印數冊送上，正值紙貴，并印譜尚屬遲待，  
只將短紙印得數冊，姑為應急。一冊托致新歲加寒，呵  
凍不能多及，以俟後報。

### 復西戾兄孫

新歲發榮，遙知閣宅必膺多福，與歲俱新，額手以祝，為  
之無已。雍升兄內為愚寫譜入刻，相交十載，去歲以賀  
後來里中，在蘇起行，愚不及以八行附候。臆底竟持來

札過我，具悉賢從近履。開函讀之，遠情頓爾一豁。并悉賢從之，能不忘我也。今復來遊，其貨已經罄存，更新親友多方嗟置，特此再囑。新歲加寒，呵凍不能多及。草布不盡欲言。

正月廿五日與聞在書

燈前葉兄將復遊故里，曾附一札申候。渠云學院將按徽寧，當與吾姪相晤。旌邑但自蘇起行，未知何日到家。其有貿復事，必然至吾里也。今接得江親翁寄札，又承麵蘋之惠，謝一。所寄白翁遺草，并石叔殘篇，亦十年前曾已數面贈我詩扇，耿耿胸臆，欲覓其遺作，苦不可得。

何吾姪之與我同心，深洽素願。當如來諭，附見教公後也。此詩有靈，必假我年一了之也。尊堂誕期，為日尚寬，寄來事畧，當細為排纂，以稱夙心。恐老筆踈率，不能盡其發揚如何。呈坎未了之局，去冬想當了之，未知其人果能如我心否耳。便向留心一訪，亦不必向其人數也。江親翁回日，作此數言，囑其帶歸附覆。餘情不盡，尚俟再報。希明一札，便間乞為致意。

復徐華隱學士書 壬午二月

夙叨末契，企仰殊深。而先生方天路翱翔，以分雲泥之隔，正愧攀躋之無自矣。容從京華來者，未嘗不述先生

下詢殷々如溢胸臆間。此古人高懷曠致。他日相逢有  
未易可得者。走屬踈頑。何幸得此于先生哉。感誦當不  
在今日也。去春賤日。寵以佳咏。秘為家珍。雖百朋不是  
過也矣。拜賜大集。雖過眼雲迷。每令穉孫日誦教篇。倚  
席聽之。啟矇發聵。恍如撥霧障而披依清光也。日以為  
佩。曷維其已。頃承高軒枉顧。既慰靚止之恩。亟圖剪韭  
夜話。少挽一日之苗。以聲調衰。而仙帆適發。欲攀之而  
靡從矣。走十年來。思輯寒舍餘脈。作一家之書。僅完二  
種。前所呈覽。尚有數種。謀梓為艱。又未知天官假我年  
否耳。竣日。懇賜弁言。先此奉期。尚俟端請。己卯蜀園先  
司馬仰附太僕公。有一時共事之雅。此直中集。中瞿臨  
桂。梧江倡和。共作不朽也。遇便裁答。草泐不盡。春夏之  
交。再臨敝邑。當奉教言。以悉所懷。



